



NEWSLETTER

OLIMPIJSKOG KOMITETA BIH

No.19 maj/jun/jul 2023



Dragi sportisti i sportski radnici,
Dragi prijatelji,

Dijeli nas manje od 400 dana do Olimpijskih igara "Pariz 2024", a Olimpijski komitet Bosne i Hercegovine kao odgovorna i proaktivna organizacija ulaže sve raspoložive napore da bh. sportistima osigura optimalne uslove učešća na predstojećim Igrama.

Naša sjajna plivačica Lana Pudar, isplivala je A olimpijsku normu i samim tim postala prvi sigurni učesnik tima koji će braniti boje Bosne i Hercegovine na Olimpijskim igrama Pariz 2024. Sjaj Olimpijske A norme je potvrdila vanserijskim uspjehom u Beogradu osvojivši tri zlatne medalje u konkurenciji najboljih juniora Evrope pri tom oborivši i tri evropska rekorda u disciplinama 50m, 100m i 200m delfin.

Jedan od njih je zasigurno Nedžad Husić koji je još jednom pokazao svjetsku sportsku klasu osvojivši drugo mjesto na nedavno održanim Evropskim igrama u Poljskoj. Radosni smo i što se naš sportista Vedad Karić uspješno oporavlja od povreda zadobijenih tokom treninga na Evropskim igrama 2023.

Dok naši sportisti osvajaju sjajne rezultate, OK BiH marljivo radi na realizaciji ambiciozno postavljene agende i plana rada OK BiH za 2023. godinu u kojoj će pored učešća na pet takmičenja, realizirati mnoštvo projekata iz raznih sfera djelovanja, a sve u cilju jačanja sportskog sistema Bosne i Hercegovine. U prethodnom periodu smo na veličanstven način proslavili Olimpijski dan u Visokom, slavivši olimpizam i njegove ideale. Sjajan domaćin po ko zna koji put je bio dr Semir Osmanagić, čuvar drevnih tajni inspirativne i bogate historije Bosne i Hercegovine.

Tokom prethodna dva mjeseca, OK BiH je nastavio kampanju za rješavanje finansiranja vrhunskog sporta u Bosni i Hercegovini ne odustajući od svojih ciljeva i zahtjeva vrhunskih sportista. Obradovani smo da intenzivno komuniciramo sa sportskim savezima BiH i pokušavamo da kreiramo zajednička rješenja u sportskom sistemu BiH. Poslednji sastanak sa čelnicima Skijaškog saveza BiH je bio efikasan i efektivan, kao i sa čelnicima Atletskog saveza BiH sa kojim je dogovoren niz zajedničkih koraka kako bi atletika, kao jedan od najtrofejnih bh. sportova, napredovala i dalje.

Planiramo aplicirati na više od 10 projekata Olimpijske solidarnosti u poljima unaprjeđenja državnog sportskog sistema, edukacije trenera, podrške vrhunskim sportistima, te promociji Olimpijskih vrijednosti i našeg bogatog olimpijskog naslijeđa.

Kao vodeća sportska organizacija u polju realizacije EU projekata i ove godine ćemo organizovati Evropsku sedmicu sporta, raditi na jačanju istinskih sportskih vrijednosti kroz sport i promociju EU vrijednosti, promovisati koncept sporta kao sredstva društvenog razvoja i filozofije olimpizma među ugroženom djecom, te nastaviti sa edukacijom i definisanjem strategije za smanjenje emisije ugljika.

Olimpijski komitet Bosne i Hercegovine će u septembru mjesecu ove godine proslaviti 30. godišnjicu od prijema u Svjetsku olimpijsku porodicu. U ovih trideset godina nizala su se iskušenja i izazovi, godine rasta Olimpijskog komiteta Bosne i Hercegovine. Zahvaljujući višegodišnjem i predanom radu, OK BiH je postao značajna međunarodna sportska organizacija koja je svojim olimpijskim plamenom obasjala put olimpijcima i vrhunskim sportistima, osnažujući razvoj sporta u Bosni i Hercegovini, ne zanemarujući i ispunjavajući svoje obaveze prema državnim institucijama i međunarodnim sportskim organizacijama.

Pred nama je EYOF "Maribor 2023" na kojem učestvujemo sa šesnaestočlanom delegacijom uz nadu da će naše mlade nade ostvariti vrhunske rezultate i da će se kao i u Beogradu, himna Bosne i Hercegovine čuti i u Mariboru.

Akademik prof. dr Izet Rađo
Predsjednik OK BiH

GODIŠNJICA OSNIVANJA OLIMPIJSKOG KOMITETA BOSNE I HERCEGOVINE



30 godina Olimpijskog komiteta Bosne i Hercegovine

Olimpijski komitet Bosne i Hercegovine osnovan je 4. juna 1992. godine. Za prvog Predsjednika OK BiH izabran je g-din Stjepan Kljuić, za zamjenika g-din Uglješa Uzelac, dok je za generalnog sekretara izabran g-din Izudin Filipović. Osnivačkom skupštinom OK BiH predsjedavao je g-din Ahmed Karabegović.

Nakon osnivanja i prvog nastupa sportista naše države na Olimpijskim igrama u Barceloni 1992. godine, uslijedilo je i zvanično priznanje od strane Međunarodnog olimpijskog komiteta (MOK-a), koji je svoju Odluku donio na zasjedanju Izvršnog komiteta u Monaku 24. septembra 1993. godine.

Nakon osnivanja i međunarodnog priznanja, Olimpijski komitet Bosne i Hercegovine je 08. decembra 2002. godine upisan u registar Ministarstva pravde BiH kao prva sportska organizacija u koju se udružuju nacionalni sportski savezi. Upisom u ovaj registar, kao i potpisom Lozanske deklaracije od 28. jula 1999. godine, Olimpijski komitet Bosne i Hercegovine je konstituisan u krovno sportsko tijelo države Bosne i Hercegovine.

Prvi grb Olimpijskog komiteta BiH izradio je akademski slikar Mersad Berber.

Olimpijski komitet BiH kao član MOK-a se obavezao poštovati pravila Olimpijske povelje, Statuta MOK-a, Etičkog kodeksa MOK-a, Svjetskog anti-doping kodeksa, zajedničke Izjave iz Lozane, Zakona o udruženjima i fondacijama BiH, te Zakona o sportu Bosne i Hercegovine.

Na Osnivačkoj skupštini OK BiH okupili su se predstavnici 20 sportskih federacija – predstavnika olimpijskih sportova, ugledni sportski radnici, predstavnici sportskih novinara, sportskih ljekara i pedagoga fizičke kulture i to: Mehmed Sokolović, Petko Radović, Dezider Jurišić, Petko Radović, Vasilije Morović, Mirsad Fazlagić, Burazor Slavko, Ahmed Karabegović, Mersad Berber, Miroslav Šipeka, Davorin Popović, Mirza Delibašić, Memnum Idžaković, Stevica Krsmanović, Branislav Crnogorac, Ale Hasanbegović, Zdenko Brož, Uglješa Uzelac, Čedo Gojković, Dragan Nožica, Mladjen Talić, Faruk Talić, Marko Petrović, Enes Terzić, Izudin Filipović, Stjepan Kljujić, Namik Terzimehić, Ismet Arslanagić, Muhamed Masleša i Manojlo Čalija. Na ovoj Skupštini Izabrani su članovi Izvršnog komiteta OK BiH u sastavu: Mirza Delibašić, Mirsad Fazlagić, Čedo Gojković, Ahmed Karabegović, Dragan Nožica, Ante Raos, Mehmed Sokolović, Miroslav Šipek i Katica Šporer. Izabrani su i članovi prvog Nadzornog odbora OK BiH i to: Muhamed Mujić - predsjednik, Vlatko Hrgić i Dako Radošević - članovi.

ČEKAMO ODGOVOR VLASTI NA ZAHTJEV OLIMPIJSKE PORODICE BOSNE I HERCEGOVINE ZA FINANSIRANJE VRHUNSKOG SPORTA



Na dnevnom redu Parlamentarne skupštine BiH koja je održana 31.05.2023. godine se između ostalog nalazila i tačka koja se odnosi na finansiranje vrhunskog sporta BiH. Tačka finansiranja vrhunskog sporta u BiH je na veliko razočarenje cjelokupne Olimpijske porodice i sportskog sistema skinuta sa Dnevnog reda.

Olimpijska porodica, sportski strukovni savezi predvođeni Olimpijskim komitetom BiH očekuju da nadležni organi i tijela u narednom periodu podrže zahtjeve i poduzmu hitne mjere na izmjeni Zakona o sportu i kreiranju boljeg ambijenta za sport koji će konačno riješiti pitanje sistemskog finansiranja vrhunskog sporta Bosne i Hercegovine.

OLIMPIJCI ZAHTIJEVAJU RJEŠAVANJE PROBLEMA FINANSIRANJA VRHUNSKOG SPORTA BOSNE I HERCEGOVINE



U Olimpijskom komitetu BiH održana je sjednica Komisije olimpijaca OK BiH koju je predvodio predsjednik Komisije Amel Tuka. Sastanak je održan u hibridnom formatu pri čemu su olimpijci koji su u trenažnom procesu u inostranstvu imali mogućnost da prisustvuju i online putem Zoom aplikacije.

Olimpijci su jedinstveni u svojim zahtjevima koje su predočili kroz sljedeće zaključke:

Olimpijci su jednoglasno podržali 9 zaključaka Okruglog stola OK BiH o sistemskom finansiranju bh. sporta.

Olimpijci su se složili da se glas sportista treba više čuti kroz rad u komisijama na državnom nivou, te da je neophodno apelovati na donosiocima odluka i nadležna ministarstva da uključe sportiste u rad svojih organa i tijela kako bi se glas sportista čuo.

Olimpijci su se složili da osnovni organ koji treba da delegira probleme sportista na Vijeće Ministara BiH - Vijeće za sport ne funkcioniše, te da se godinama nisu sastali.

Olimpijci očekuju veći angažman bivših sportista koji trenutno obnašaju političke pozicije u organima i tijelima, te mogu napraviti promjenu u ovom segmentu.

Olimpijci su također diskutovali o donesenoj Odluci Doma Naroda Parlamentarne Skupštine BiH kojom je odbijena podrška sportistima izdvajanjem adekvatnih i namjenskih sredstava OK BiH kako bi se finansirale pripreme sportista u predolimpijskoj godini. Sve zaključke Komisije, kao i više o ovoj temi pročitajte na linku [OVDJE](#).

OLYMPIC DAY 2023 | PROSLAVILI SMO OLIMPIJSKI DAN U VISOKOM!



Ovogodišnje izdanje manifestacije koja proslavlja olimpirizam u Bosni i Hercegovini, "Olympic Day 2023", održano je u organizaciji Olimpijskog komiteta BiH u partnerstvu sa Fondacijom: "Arheološki park: Bosanska piramida Sunca" u Visokom u Parku Ravne II.

U inspirativnom ambijentu Arheološkog parka Ravne 2, preko 150 školaraca iz 6 osnovnih škola su uz druženje sa bh. olimpijcima praktikovali 9 sportova: rukomet, fudbal, košarku, odbojku, tenis, stoni tenis, taekwondo, streljaštvo i karate.

Manifestaciju je otvorio potpredsjednik Olimpijskog

komiteta BiH akademik Izet Rađo, zajedno sa domaćinom dr Semirom Osmanagićem, kao i Francuskom ambasadoricom u BiH N.J.E. Christine Toudic koja je najavila naredne Olimpijske igre "Paris 2024" naglasivši važnost promocije olimpijske ideje kako u Bosni i Hercegovini tako i širom svijeta.



Prisutnim su se obratili i ministrica Federalnog ministarstva kulture i sporta Sanja Vlasisavljević, te gradonačelnik Visokog Mirza Ganić.

Manifestaciji su prisustvovali i predstavnici Ministarstva civilnih poslova BiH, te ostali predstavnici državnih, kantonalnih i lokalnih vlasti.



Bh. olimpijci Nedžad Husić, Elvedina Muzaferija, Emir Lokmić, Strahinja Erić i Esmā Alić su simbolično otvorili Olympic Day trčanjem počasnog olimpijskog kruga sa osnovcima iz Visokog. Nakon dvočasovne zabave otkrivanja novih sportova i druženja sa olimpijcima, svi učesnici su dobili certifikat Međunarodnog olimpijskog komiteta.



Više o Olimpijskom danu kao i samoj manifestaciji pročitajte [OVDJE](#).

OLYMPIC DAY 2023 | "ARHEOLOŠKI PARK: BOSANSKA PIRAMIDA SUNCA" VISOKO!



Izjavu potpredsjednika akademika Izeta Rađe povodom Olimpijskog dana poslušajte na [ovom linku](#).

Video manifestacije povodom Svjetskog dana olimpizma pogledajte [OVDJE](#).



OLYMPIC DAY 2023 | LET'S MOVE KAMPANJA



Međunarodni olimpijski komitet je ove godine pokrenuo kampanju "Let's Move" a kojoj je cilj okupiti sve sudionike kako bi se stvorio globalni pokret koji će inspirirati ljude da nađu vrijeme za svakodnevnu fizičku aktivnost.

Ova kampanja je nova globalna olimpijska inicijativa za podsticanje mladih da se kreću i vode aktivan životni stil. U sklopu #LetsMove kampanje Sarajevska Vijećnica je 23.06.2023. godine bila u znaku olimpijskih krugova čime se i Sarajevo pridružilo globalnoj inicijativi koju vode Međunarodni olimpijski komitet i Svjetska zdravstvena organizacija.

Izvor tekst i foto: www.sarajevo.ba

"Olimpijsko Sarajevo zajedno sa drugim gradovima iz olimpijske porodice promoviše sport, zdravlje, prijateljstvo, poštovanje i sve pozitivno što olimpizam nosi u sebi", kazala je gradonačelnica Benjamina Karić. Gradonačelnica je istakla da se Grad Sarajevo zdušno priprema za slavljenički februar iduće godine kada ćemo obilježiti 40. godišnjicu održavanja ZOI 1984.

LET'S MOVE | OLYMPIC DAY 2023

24 ICONIC LANDMARKS & ALL OLYMPIC CITIES TO LIGHT UP



♥ SOUTH KOREA
PYEONGCHANG

♥ ARGENTINA
BUENOS AIRES

♥ MEXICO
MEXICO CITY
3 LOCATIONS

♥ AUSTRALIA
BRISBANE

♥ CHINA
BEIJING, NANJING, XIAMEN
7 LOCATIONS

♥ GREAT BRITAIN
LONDON

♥ HUNGARY
BUDAPEST

♥ SPAIN
BARCELONA

♥ JAPAN
TOKYO

♥ ITALY
MILANO

♥ B&H
SARAJEVO

♥ BRAZIL
RIO DE JANEIRO

♥ UAE
DUBAI

♥ SWITZERLAND
GENEVA AND LAUSANNE

OVDJE pogledajte poziv olimpijca Nedžada Husića da se, bez obzira na fizičku spremnost, pokrenete i pridružite proslavi Olimpijskog dana.

PREDSJEDNIŠTVO OK BIH | SASTANAK SA PREDSTAVNICIMA SKIJAŠKOG SAVEZA BOSNE I HERCEGOVINE

Čelnici Olimpijskog komiteta Bosne i Hercegovine održali su radni sastanak sa predstavnicima Skijaškog saveza Bosne i Hercegovine.

Tema sastanka je bila dosadašnja i buduća saradnja Olimpijskog komiteta BiH i Skijaškog saveza BiH, jer, kako je istakao Predsjednik OK BiH akademik Izet Rađo: "Zajednička saradnja stvara bolje uslove i ambijent u kojim sportisti nesmetano mogu da treniraju i osvajaju visoke plasmane na takmičenjima."

Predsjednik Skijaškog saveza Samir Smajić se zahvalio na gostoprimstvu iskazavši nadu da će saradnja između OK BiH i Saveza i u budućnosti biti uspješna kao što je to bilo i do sada.

Sastanku su ispred OK BiH prisustvovali predsjednik akademik Izet Rađo, potpredsjednik prof. dr Milanko Mučibabić i generalni sekretar doc. dr Said Fazlagić, a ispred Skijaškog saveza BiH predsjednik Samir Smajić, potpredsjednik Bojan Lekić, članovi Upravnog odbora Saveza Ljubiša Tanić i Vlado Milojević i tehnički sekretar Saša Kurto.



PREDSJEDNIŠTVO OK BIH | SASTANAK SA ATLETSKIM SAVEZOM BIH I PRISUSTVO SENIORSKOM ATLETSKOM PRVENSTVU

Predsjedništvo Olimpijskog komiteta BiH, predsjednik akademik Izet Rađo i potpredsjednik prof. dr Milanko Mučibabić, prisustvovali su Seniorskom atletskom prvenstvu Bosne i Hercegovine u Zenici, te tom prilikom održali radni sastanak sa predstavnicima Atletskog saveza Bosne i Hercegovine.

Tema sastanka su bili dosadašnji i budući zajednički projekti, podrška bh. olimpijcima za predstojeće Olimpijske igre Pariz 2024, te sveukupno podizanje dosadašnje uspješne saradnje OK BiH i AS BiH na viši nivo.

Ispred Atletskog saveza BiH sastanku su prisustvovali predsjednik Duško Ivičić, potpredsjednik Suad Kaknjo, član UO AS BiH i član IK OK BiH prof. dr Goran Bošnjak, te generalni sekretar Mehmed Lokmić.

Ovom prilikom, predsjednik OK BiH akademik Izet Rađo dodijelio je medalje najuspješnijim atletičarima Bosne i Hercegovine u disciplini 100 metara: Edhem Vokal (zlat), Nuredin Zekan (srebro), Egon Savić (bronz).



SPORTSKE IGRE MLADIH 2023 | PREDSDJEDNIK OK BIH URUČIO MEDALJE FINALISTIMA 13. PLAZMA SPORTSKIH IGARA MLADIH 2023




Uz tradicionalnu podršku Olimpijskog komiteta Bosne i Hercegovine kao Specijalnog partnera, u Sarajevu je sinoć održano Veliko finale 13. Plazma Sportskih igara mladih 2023!

Medalje finalistima ovogodišnjeg izdanja Sportskih igara mladih dodijelio je predsjednik Olimpijskog komiteta Bosne i Hercegovine, prof. dr Milanko Mučibabić. Takmičenja ovogodišnjeg izdanja Sportskih igara mladih su trajala od marta mjeseca. Ovogodišnje igre su okupile rekordan broj učesnika - preko 60 000 djece iz 46 bh. gradova.

Veliko finale je održano u Hotelu Hills u Sarajevu od 4 - 6. jula 2023. godine, a okupilo je 955 finalista. Osvajači zlatnih medalja, njih čak 220, putuje u Spit na Međunarodno finale Sportskih igara mladih koje će održati krajem avgusta.



SKUPŠTINA I KONFERENCIJA INTERNACIONALNE AKADEMIJE NAUKA I UMJETNOSTI U BOSNI I HERCEGOVINI




Dana 20. maja 2023. godine Internacionalna akademija nauka i umjetnosti u Bosni i Hercegovini (IANUBIH) organizovala je skupštinu i konferenciju na temu: "Sarajevo i svijet." Na akademiji su bili okupljeni vrhunski stručnjaci iz multidisciplinarnih oblasti.

Predsjednik IANUBIH, akademik Asim Kurijak je u obraćanju istaknuo važnost i vrijednosti ove izuzetne naučne institucije. Broj citata članova akademije je na zavidnom nivou.

"Prema relevantnim podacima mi smo najjače intelektualno društvo u BiH s više od pola miliona citata. To znači da je pola miliona ljudi u svijetu citiralo radove naših članova, a 16 članova Akademije su članovi Evropske akademije što se nikada ovdje nije dogodilo"- rekao je Kurijak, koji je i sam član 12 svjetskih akademija.

Ono na što smo posebno ponosni jeste činjenica da su tog dana dodjeljene povelje za redovne članove među kojima je naš potpredsjednik, akademik prof. dr Izet Rađo promoviran u redovnog člana akademije.

Ovo je veliko priznanje za zasluženi rad i doprinos naučnoj misli koji je akademik, prof. Rađo dao do sada, ali i pečat vrijednosti njegove istinske ljubavi i odanosti nauci koji živi svaki dan.



SPORTSKI SAVEZI BOSNE I HERCEGOVINE

DŽUDO SAVEZ BIH ODRŽAO KAMP SA EKSPERTOM IZ JAPANNA

Džudo savez Bosne i Hercegovine održao je kamp na kojem su učesnici svih starosnih kategorija mogli uživati u edukaciji instruktora i džudo eksperta iz Japana Juta Nishimakija. Kamp je organizovan u saradnji Japanske ambasade u Bosni i Hercegovini, Japanske međunarodne agencije za saradnju i Džudo saveza Bosne i Hercegovine.

Na kampu koji je trajao šest dana prisutni učesnici učili su nove vještine i tehnike, a ekspert Nishimaki je i ovoga puta bio na visini zadatka.



„Ovaj kamp je sinonim prijateljstva dvije zemlje. Poznato je da je Japan zemlja koja je mnogo pomagala Bosnu i Hercegovinu, te posebno džudo sport, koji zapravo i potiče iz Japana. Ekspert Juto Nishimaki je i ovoga puta bio na visini zadatka, a moram istaći posebnu zahvalnost i Nj.E. Kinefuchi Masamiju, ambasadoru Japana u Bosni i Hercegovini“, istakao je prof. dr. Branislav Crnogorac, koji je najzaslužniji što je džudo najtrofejniji olimpijski sport u BiH. O saradnji dvije zemlje i sportu kao motivirajućem faktoru govorio je ambasador Japana u Bosni i Hercegovini.



„Ovaj kamp djeluje motivirajuće na mlade džudoke u Bosni i Hercegovini, te će doprinijeti produbljivanju prijateljskih odnosa naše dvije zemlje. I dalje ćemo pomagati razvoj Bosne u Hercegovine u svim segmentima, a posebno u sportu“, istakao je Nj.E. Kinefuchi Masami, ambasador Japana u Bosni i Hercegovini.

Kampu su prisustvovali i najbolje bh. judoke, Larisa Cerić, Aleksandra i Anđela Samardžić, te Toni Miletić.

ČELNICI RUKOMETNOG SAVEZA BiH U RADNOJ POSJETI OLIMPIJSKOM KOMITETU BiH

Potpredsjednik OK BiH akademik Izet Rađo i generalni sekretar doc. dr Said Fazlagić primili su u radnu posjetu predstavnike Rukometnog saveza Bosne i Hercegovine predsjednika Vladimira Brankovića, potpredsjednika Kenana Magodu, selektora Muške A rukometne reprezentacije Irfana Smajlagića, Enida Tahirovića i generalnog sekretara Nedima Arnautovića.

Zvaničnici Rukometnog saveza BiH predstavili su svoj rad, modele za unapređenje rukometnog sporta u BiH, kao i planove za budućnost.

Podpredsjednik OK BiH akademik Izet Rađo je čestitao Selektoru na ostvarenim kvalifikacijama za Evropsko prvenstvo koje će se održati u Njemačkoj u januaru 2024. godine, te na sjajno urađenom poslu i na harmoniziranju Reprezentacije u kojemu su promovisani mladi igrači koji igraju u bh. rukometnoj ligi.

Razgovarano je i o načinima na koje Olimpijski komitet BiH može kroz projekte da pomogne Rukometnom savezu BiH kad je u pitanju njihov rad, kako u domenu menadžmenta tako i u domenu potpore reprezentativnim selekcijama.

Čelnici Rukometnog saveza su iskoristili priliku da se zahvale Olimpijskom komitetu BiH koji je i do sada pronalazio razne načine da pomogne Rukometnom savezu BiH i rukometnim reprezentacijama.

Zaključeno je da je neophodno zajedno sinergijski raditi na budućnosti bh. sporta i posebno rukometnog sporta. Naš zajednički cilj je da se Rukometna reprezentacija BiH kvalifikuje za nastup na jednoj od narednih edicija najveće smotre sporta – Olimpijskim igrama.

Izvor foto: [Rukometni savez BiH](#)



GIMNASTIČKI SAVEZ BIH DOBIO VRIJEDNU DONACIJU GIMNASTIČKE OPREME OD JAPANA



U Olimpijskom komitetu BiH održan je svečani prijem, 18.05.2023. godine povodom donacije opreme Gimnastičkog saveza Japana Gimnastičkom savezu Bosne i Hercegovine.

Svečanosti su, pored predsjednika OK BiH prof. dr Milanka Mučibabića, te potpredsjednika OK BiH akademika Izeta Rađe i gospodina Marijana Kvesića i generalnog sekretara doc. dr Saida Fazlagića, prisustvovali N.J.E. Masami Kiniefuchi, ambasador Japana u Bosni i Hercegovini, Chisato Yoshida, prvi

sekretar Ambasade, te predsjednik Gimnastičkog saveza Bosne i Hercegovine gospodin Adamir Raščić, prof. dr Mersad Čuljević, član Upravnog odbora GS BiH i Amir Mahmutović, predsjednik Skupštine GS BiH.

Ideja za donaciju nastala je 2021. godine nakon sastanka u Olimpijskom komitetu Bosne i Hercegovine sa Predsjednikom Svjetske gimnastičke federacije gospodina Morinari Watanabe koji je prepoznao neophodnost ulaganja u ovaj bazni sport u Bosni i Hercegovini.



Predsjednik OK BiH prof. dr Milanko Mučibabić se zahvalio u ime Olimpijske porodice Bosne i Hercegovine, te istakao značaj ove vrijedne donacije za razvoj gimnastičkog sporta u Bosni i Hercegovini.

Donirano je 100 tona gimnastičke opreme za sportsku i ritmičku gimnastiku. Razboji, parteri, konji, kolutovi, trampoline, strunjače i druge sprave i rekviziti raspoređeni su u tri bh. grada (Sarajevo, Zenica, Banja Luka), te će biti od nemjerljivog značaja i koristi kako bi mladi gimnastičari unaprijedili svoje vještine.



Ovom prilikom Gimnastički savez BiH je uručio Zahvalnicu Olimpijskom komitetu Bosne i Hercegovine za trud i zalaganje u realizaciji projekta donacije gimnastičke opreme.

KARLING SAVEZ BIH | POSJETA KARLING SAVEZU ŠVEDSKE



Delegacija Karling saveza Bosne i Hercegovine, prisustvovala je 01. maja 2023. godine EU Sport forumu koji je održan u Štokholmu, Švedskoj.

Na EU Sport forumu upriličen je sastanak sa predstvanicima Karling saveza Švedske, gdje je uspostavljena saradnja ova dva saveza.

Dogovoren je čitav niz aktivnosti međusobne saradnje koje se, prije

svega, odnose na podršku Karling savezu BiH. Riječ je o ustupanju opreme za izvođenje treninga, stručnoj pomoći kroz odlazak mladih trenera i takmičara u kampove koje održava Karling savez Švedske i klubovi.

Karling savezu BiH je ponuđena i tehnička pomoć u izgradnji ledene plohe za karling kada se steknu materijalni uslovi, odnosno obezbijede finansijska sredstva za izgradnju iste. Sa Generalnim sekretarom Karling saveza Švedske gosp. Stefan Lund-om dogovoreno je i potpisivanje memoranduma o saradnji kojim bi usaglasili ključne tačke saradnje Karling saveza BiH i Švedske. Naveden sastanke je pripremio gosp. Milan Knežević, sarajlija i prijatelj koji živi u Štokholmu.

KIK BOKS | PRIKAZAN PRVI FILM O SPORTAŠICAMA BOSNE I HERCEGOVINE KOJE UVIJEK DONOSE MEDALJE

U prostorijama Olimpijskog komiteta Bosne i Hercegovine 13. juna održana je premijera dokumentarnog filma o djevojkama u kickboks, koji su radili studenti Internacionalnog univerziteta u Sarajevu s odsjeka Vizualne umjetnosti i dizajna vizualnih komunikacija.

U saradnji sa Kickboks savezom BiH, napravili su prvi film o hrabrim, istinskim i najboljim kickbokserkama, koje godinama donose medalje sa evropskih i svjetskih prvenstava u Bosnu i Hercegovinu te tako razbijaju stereotipe o ženama u borilačkim sportovima.

Glavni inicijator projekta je potpredsjednik Kik boks saveza BiH, gospodin Elvedin Dubravac, a mentor projekta je Emir Hambo, šef odsjeka za umjetnost i program koordinator Vizualnih umjetnosti i dizajna vizualnih komunikacija.

Pobjednički film pod nazivom "DOSTA" formila je grupa studenata "BoxBox", u čijem sastavu su bili: Emina Memija, Marija Mikulić, Aida Prolić, Admir Jusić i Ervin Golubović.


Navedeni studenti čiji je film izabran, nagrađeni su plaketama i novčanom nagradom.

Film možete pogledati [OVDJE](#).



TRIATLON SAVEZ BIH | DRŽAVNO PRVENSTVO BIH U AKVATLONU

U organizaciji TK „Sidro“ Neum, 10.06.2023. godine održano je Državno prvenstvo BiH u akvatlonu za seniore, kao i takmičenje u akvatlonu za mlađe dobne kategorije. Utrka se bodovala za Triatlon ligu BiH. U muškoj kategoriji, prvo mjesto je osvojio i postao državni prvak BiH u akvatlonu za 2023. godinu Belmin Godinjak, drugo mjesto je osvojio Benjamin Godinjak, a treće Goran Klempić. U ženskoj konkurenciji, prvo mjesto je zauzela i postala državna prvakinja BiH u akvatlonu za 2023. godinu Anđela Talić, drugo mjesto Jasmina Sinanović, a treće Maja Roso Popovac. Takmičari Triatlon i pentatlon saveza BiH su uspjeli da izbore nastup na međunarodnim utrkama i uspješno završe vrlo zahtjevna takmičenja u triatlonu. Bh. takmičari su u proteklom periodu nastupili



ī na Europe Triathlon Cup Wels 2023, u Austriji, Ironman utrci Challenge Roth 2023 u Njemačkoj i utrci IRONMAN Championship Frankfurt 2023. Svi takmičari su uspješno savladali ove vrlo zahtjevne trke.



AKTIVNOSTI SAVEZA DIZAČA TEGOVA BIH



U Sali kluba Sarajevo, stadion Koševo, održano je seniorsko prvenstvo BIH za 2023 godinu, 28.05.2023. kao i prvo kolo ekipnog prvenstva u tehničkoj organizaciji klubova KDT Željezničar i KDT IsANEH.

Konačno, nakon niza godina učestvovalo je 7 klubova iz svih krajeva BIH iz oba entiteta. Zahvaljujući novom rukovodstvu SDTBiH izabranom 18.05.2023. godine, mnogi klubovi su se ponovo uključili u sistem takmičenja.

Uz oboren niz rekorda BIH, prvenstveno seniorskih, takmičenje je održano u ugodnoj atmosferi u kojoj je fair play bio na prvom mjestu.



U Mađarskom gradu Zalaegerszeg je održan, 57. po redu Alpe Adria Cup, najstariji turnir u Svijetu.

Najbolji rezultat je ostvario Faris Durak, koji je 3 puta obarao seniorske rekorde BIH u kategoriji 73 kg podigavši 100 kg u trzaju, 117 kg u izbačaju, te 217 u biatlonu. Faris Durak je osvojio prvo mjesto u konkurenciji seniori, kategorija 73 kg. Osim u konkurenciji seniori, Faris je oborio rekorde i u konkurenciji Studenti i u U23, tako da je ukupno 9 rekorda BIH Faris oborio na ovom takmičenju.

Odličan rezultat je napravio i Bojan Vještica debitant mladi Banjalučanin, koji je osvojio prvo mjesto u konkurenciji Juniori, kategorija preko 109 kg.

Ne manje dobar rezultat je ostvarila debitantkinja Azra Alatović, koja je podigavši 55 kg u trzaju i 73 kg u izbačaju, kao i 128 kg u biatlonu, čime je 5 puta oborila seniorski rekord BIH. Takođe, odličan rezultat i plasman, debitanta Zerina Kobilica, koji je sa podignutih 110 kg u trzaju i 140 kg u izbačaju, te 250 kg u biatlonu, osvojio odlično drugo mjesto u seniorskoj konkurenciji u kategoriji 89 kg.

Iz Saveza ističu da su izuzetno zadovoljni ostvarenim rezultatima, jer ne samo da je oboreno mnoštvo državnih rekorda, nego su osvojene i medalje i to dvije najsajnije, a to je ostvarila ekipa izabrana od novog Selektora, doajena BH dizanja tegova Ivica Solde, tako da je ekipa sa čak 3 debitanta napravila odličan rezultat. Trener reprezentacije Haris Durak, također doajen BiH dizanja tegova, je besprijekorno vodio ekipu do navedenih rezultata.

Tokom Evropskog prvenstva U15 U17 2023 u Moldaviji bh. internacionalne sudije Enisa Mašić i Nedim Mašić, bili su članovi Žirija. Generalnom sekretaru Nedimu Mašiću, ukazana je čast i da podijeli medalje za izbačaj za konkurenciju Youth 49 kg muški, kao i Enisi Mašić u jednoj od narednih kategorija. Sve rezultate i aktivnosti Saveza dizača tegova možete pogledati na linku [OVDJE](#).

BH • TEAM

EVROPSKE IGRE KRAKOW MALOPOLSKA 2023



Treće po redu Evropske igre Krakow Malopolska 2023 održane su od 21. juna do 02. jula 2023. godine. Igre su okupile preko 7000 najboljih sportista iz 48 zemalja Evrope koji su se tokom 12 takmičarskih dana nadmetali u 26 sportova/29 disciplina, od kojih je bilo 18 olimpijskih sportova kao dio kvalifikacija za OI Pariz 2024. U sklopu igara 12 sportova su ujedno bila i evropska prvenstva.

Bosnu i Hercegovinu je predstavljalo 55 sportista i 22 trenera/oficijela iz ukupno 8 sportova: atletika, taekwondo, boks, karate, kanu sprint, kanu slalom, streljaštvo i brdski biciklizam. Zastavu na ceremoniji otvaranja su nosili taekwondoisti Nedžad Husić i Ada Avdagić.



Najbolji rezultat ostvario je olimpijac Nedžad Husić, osvojivši srebrnu medalju u taekwondo kategoriji do 74 kilograma. Olimpijski komitet BiH je Nedžadov rezultat nagradio sa 10.000 KM, uz prateću nagradu treneru u visini od 5.000 KM.



Nedžad Husić
Kyorugi -74 kg, SREBRNA MEDALJA

TAEKWONDO



Predsjedništvo Olimpijskog komiteta Bosne i Hercegovine, predsjednik prof. dr Milanko Mučibabić, te potpredsjednici akademik Izet Rađo i gosp. Marijan Kvesić su tokom Igara bodrili tim te održali sastanke sa predstavnicima bh. tima atletike i #EG2023.



Predsjednik prof. dr Milanko Mučibabić je imao posebno zadovoljstvo dodijeliti medalje u taekwondo kategoriji do 74 kg, u kojoj je bosanskohercegovački olimpijac Nedžad Husić osvojio srebrno odličje, dok je potpredsjednik akademik Izet Rađo dodijelio medalje najboljim karatistkinjama u kategoriji do 61 kilogram.



LANA PUDAR ISPLIVALA "A" OLIMPIJSKU NORMU I DOMINANTNO OSVOJILA TRI ZLATNE MEDALJE NA EVROPSKOM JUNIORSKOM PRVENSTVU



Naša olimpijka, najbolja bh. plivačica Lana Pudar je prvi kvalifikovani učesnik bh. tima na Olimpijskim igrama Pariz 2024! Lana je u maju mjesecu u plivačkoj disciplini delfin na 200 metara s vremenom 2:08.36 ostvarila pobjedu u Barseloni, te je na taj način ispunila A normu za Olimpijske igre koje će se održati od 26. jula do 11. avgusta 2024. godine u Parizu.

S obzirom da je Lana Pudar prva i do sada jedina ispunila A normu za Olimpijske igre Pariz 2024, Izvršni komitet OK BiH je na prijedlog Predsjedništva OK BiH odobrio dodatna sredstva u visini od 30.000,00 KM za nastavak priprema i nastupe do početka Olimpijskih igara Pariz 2024, sa ciljem postizanja što boljih rezultata do i na OI Pariz 2024.

U nastavku sezone, Lana je nastavila nizati izvanredne uspjehe. Na Evropskom juniorskom prvenstvu u Beogradu, naša olimpijka je dominantno osvojila tri zlatne medalje u disciplinama 50m, 100m i 200m delfin! Rezime učešća na Evropskom juniorskom prvenstvu Lane Pudar je sljedeći:

Vrijeme 56.95 u finalu juniorskog prvenstva Evrope u disciplini 100 metara delfin

1. Juniorska prvakinja Evrope;
2. A olimpijska norma;
3. Rekord evropskih juniorskih prvenstava;
4. Najbolji rezultat u Evropi u seniorskoj konkurenciji u 2023. godini;
5. Osmi najbolji rezultat u Evropi u seniorskoj konkurenciji svih vremena;
6. Drugi najbolji rezultat u Evropi svih vremena u juniorskoj konkurenciji. Brže vrijeme od Laninog ima samo višestruka olimpijska, svjetska i evropska prvakinja i rekorderka Sarah Sjostrom;
7. Novi državni rekord.

Vrijeme 02:06.26 u finalu juniorskog prvenstva Evrope u disciplini 200 metara delfin

1. Juniorska prvakinja Evrope;
2. A olimpijska norma;
3. Juniorski rekord Evrope;
4. Rekord evropskih juniorskih prvenstava;
5. Najbolji rezultat u Evropi u seniorskoj konkurenciji u 2023. godini;
5. Četvrti najbolji rezultat na svijetu u seniorskoj konkurenciji u 2023. godini;
6. Lanino vrijeme je brže od USA rekorda za djevojčice 17/18 godina, koji drži aktuelna olimpijska viceprvakinja Regan Smith;
7. Četvrto vrijeme sa zadnjih olimpijskih igara u Tokiju;
8. Novi državni rekord.

Vrijeme 26.10 u finalu juniorskog prvenstva Evrope u disciplini 50 metara delfin

1. Juniorska prvakinja Evrope;
2. A FINA norma;
3. Rekord evropskih juniorskih prvenstava;
4. Najbrže vrijeme u Evropi u juniorskoj konkurenciji u 2023. godini;
5. Novi državni rekord.

BRAVO!!! Čestitke Lani, njenom timu i Plivačkom savezu BiH.

PREDSJEDNIK OK BIH PROF. DR MILANKO MUČIBABIĆ | ZLATNA MEDALJA NA EVROPSKOM DŽUDO PRVENSTVU ZA VETERANE



Na Evropskom judo prvenstvu za veterane koje se održava od 8. do 10. juna u Sloveniji, predsjednik OK BiH prof. dr Milanko Mučibabić je osvojio još jednu u nizu zlatnu medalju za Bosnu i Hercegovinu, što potvrđuje kontinuitet vrhunskih rezultata Predsjednika OK BiH u ovoj kategoriji.

Prof. dr Mučibabić je nosilac majstorskog zvanja 9. DAN u džudou, što je najviše zvanje ovog olimpijskog sporta u Bosni i Hercegovini, ali i šire. Aktivno se bavi džudom punih 58 godina kao sportista i sportski radnik. Na putu do 9. DAN-a majstorskog zvanja ostvario je izuzetne uspjehe kao takmičar, trener i sportski radnik. Tokom zlatnog perioda sporta u bivšoj Jugoslaviji, osvojio je evropske i svjetske medalje kao takmičar i trener reprezentacije (1981, 1982, 1986. godine), a najtrofejniji je veteran džudo sporta Bosne i Hercegovine kao višestruki evropski i svjetski veteranski šampion (2010, 2013, 2016, 2017, 2019, 2022. i 2023. godine).

Predsjednik prof. dr Mučibabić kao dugogodišnji istaknuti sportista i sportski radnik svojim aktivnostima je primjer mladima da sport nema granica.

TOMISLAV CVITANUŠIĆ | SA NAJVIŠEG VRHA SVIJETA U OLIMPIJSKI KOMITET BIH



Predsjednik Nadzornog odbora Olimpijskog komiteta BiH Tomislav Cvitanušić nakon uspješne ekspedicije na Mount Everest (najviši vrh na Planeti, 8848 metara) posjetio je Olimpijski komitet BiH.

Dobrodošlicu u OK BiH su mu poželjeli potpredsjednik OK BiH akademik Izet Rađo, generalni sekretar OK BiH doc. dr Said Fazlagić, te Radna grupa za obilježavanje 40. godina ZOI 84., koji su iskoristili kratku pauzu u radu da srdačno pozdrave našeg alpinistu, čestitaju na uspjehu, te požele još mnogo uspješnih ekspedicija.

Bosanskohercegovački alpinista, ironman, triatlonac i Predsjednik Nadzornog odbora Olimpijskog komiteta BiH je uspješno popeo najviši vrh Planete, Mount Everest, 17.05.2023. godine kada se na krovu Svijeta zavijorila zastava Bosne i Hercegovine.

Iskrene čestitke Tomislavu i cijelom timu.

DŽUDO | ANĐELA SAMARDŽIĆ MEĐU 16 NAJBOLJIH NA SVJETSKOM JUDO PRVENSTVU U DOHI

Bh. predstavnik Anđela Samardžić nastupila je na Svjetskom judo prvenstvu u Dohi gdje je ostvarila plasman među 16 najboljih u kategoriji do 57 kilograma. Samardžić je u konkurenciji 50 učesnica ostvarila dvije pobjede nad predstavnicama Australije i tima izbjeglica, a poražena je od predstavnice Turske u pohodu na četvrtfinale.

“Napravila sam jednu malu grešku koja me koštala borbe, ali sam jako zadovoljna jer sam uspjela ostvariti plasman među 16 najboljih na svijetu i zaraditi 320 bodova na olimpijskoj listi. Poprilično sam sretna jer vidim da sam zaista nadomak olimpijske norme za Pariz 2024 godine”, kazala je Samardžić. Ovim rezultatom Anđela Samardžić je osvojila 320 bodova na olimpijskoj rang listi, a ovi bodovi daju nadu da bi u konačnici mogla ostvariti olimpijsku normu i plasman na Igre u Parizu 2024. godine.



DŽUDO | EVROPA JUDO KUP ZA SENIORE ISTOČNO SARAJEVO 2023



Evropa džudo kup za seniore održan je 20. i 21.05. u dvorani “Peki” - Pale, a bh. predstavnici su osvojili tri medalje.

Zlatnu medalju u kategoriji do 57 kilograma osvojila je Anđela Samardžić, a zlatni je bio i Božidar Vučurević u kategoriji do 90 kilograma. Bronzanu medalju osvojio je Vasilije Vujičić u apsolutnoj kategoriji.

Džudo savez Bosne i Hercegovine i ovog puta je dobio visoke ocjene za organizaciju, a evropska džudo takmičenja u našu zemlju vraćaju se

16. i 17. septembra, kada će bh. prijestolnica ugostiti Evropa Open.



TAEKWONDO | NEDŽAD HUSIĆ OSVOJIO PETO MJESTO NA SVJETSKOM TAEKWONDO PRVENSTVU U AZERBEJDŽANU

Nedžad Husić osvojio je peto mjesto na Svjetskom taekwondo prvenstvu koje se održalo u Azerbejdžanu. Najbolji taekwondo borac iz Bosne i Hercegovine i najbolje plasirani bh olimpijac na OI Tokyo, bio je slobodan kao nosilac u prvom kolu, u drugom i trećem kolu ostvario je pobjede nad predstavnicima Amerike i Nigera, dok je u četvrtfinalu zaustavljen od predstavnika Srbije.

Ovim nastupom Husić je po treći put zaredom osvojio peto mjesto. Isti rezultat ostvario je na prvenstvu u Manchesteru 2019. godine, te Guadalajari 2022. godine.



Osim Husića na Svjetskom prvenstvu nastupilo je još sedam bh. takmičara, Ada Avdagić, Dinko Šegedin, Petra Ždero, Muhamed i Ibrahim Đonko, Katarina Kraišnik i Ivana Šarenac. Po jednu pobjedu ostvarili su Muhamed Đonko i Petra Ždero, dok su ostali zaustavljeni u prvom kolu. Čestitke!

TAEKWONDO | UKUPNO 17 MEDALJA ZA BIH NA TAEKWONDO “2023 MULTI EUROPEAN GAMES”



Taekwondo predstavnici Bosne i Hercegovine su osvojili čak 17 medalja na taekwondo “2023 Multi European Games” koje su se održale u Sarajevu od 11. do 14. maja 2023. godine.

Posljednjeg dana takmičenja “Taekwondo Multi European Games” Džejla Makaš osvojila je zlatnu medalju za Bosnu i Hercegovinu u konkurenciji seniorki. Osim Makaš, bronzanu medalju je osvojila Katarina Kraišnik. Zlatne medalje u konkurenciji juniora osvojili su Benjamin Husić, Sara Pidro i Marija Jokić, dok su bronzani bili Marija Orlović, Nino Šeremet, Adna Berbić,

Ejla Makaš, te Ahmed Dizdar. U konkurenciji kadeta zlatom se okitila Sara Džafić, a bronzani su bili Hana Kadrić, Esma Bahtanović, Lamija Alihodžić i Vedad Šehić. U konkurenciji seniora osim navedenih medalja Makaš i Kraišnik, svoje medalje trećeg dana turnira osvojili su Nadina Mehmedović i Petra Ždero.

Čelnici Evropske taekwondo unije istakli su zadovoljstvo organizacijom Taekwondo saveza BiH. Podsjećamo da je ovo prvo od pet velikih takmičenja koja će biti održana u našoj državi ove godine, a naredno veliko takmičenje koje će biti održano u augustu je Svjetsko prvenstvo za kadete.

FUDBAL | EDIN DŽEKO UŠAO U ISTORIJU EVROPSKOG FUDBALA



Nastupom u finalu Lige šampiona, bh. dijamant Edin Džeko je ušao u istoriju fudbala! Reprezentativac Bosne i Hercegovine je igru napustio u 58. minuti susreta kada zbog povrede nije mogao da nastavi meč.

Olimpijski komitet Bosne i Hercegovine čestita Edinu Džeki na drugom mjestu u okviru Champions League što predstavlja ogroman uspjeh. Također, čestitke upućujemo njegovoj porodici, klubu, saradnicima i Nogometnom/fudbalskom savezu BiH.

KOŠARKA | DŽANAN MUSA OGRNUT ZASTAVOM BOSNE I HERCEGOVINE PROSLAVIO TITULU EVROPSKOG PRVAKA

Košarkaši Real Madrida osvojili su naslov evropskih prvaka nakon što su u velikom finalu Eurolige igranom u litvanskom Kaunasu svladali Olympiacos rezultatom 79:78. Reprezentativac Bosne i Hercegovine Džanan Musa postigao je šest poena uz četiri asistencije.

Musa je na terenu proveo nešto više od 10 minuta u prvom poluvremenu. Upisao je tri poena i tri asistencije. 'Trojku' je pogodio za vodstvo 45:40 za Real. U trećoj dionici proveo je pet minuta i postigao tri poena. Četvrtinu je završio sa šest poena na kontu.

Pobjednički koš tri sekunde prije kraja postigao je Sergio Llull, koji je s poludistance preko Fala pogodio šut vrijedan evropskog trona. Za Kraljevski tim ovo je 11. titula prvaka Evrope!

Čestitke našem reprezentativcu i sjajnom Real Madridu!

Izvor tekst: radiosarajevo.ba; Izvor foto: [Instagram/Džanan Musa](https://www.instagram.com/DžananMusa)

Džana Musa je prethodno izdabran u najbolju petorku košarkaške Eurolige nakon što su zbrojeni glasovi navijača, trenera, kapitena ekipa i novinara.

Uz Musu, u idealnu petorku su uvršteni i njegov saigrač Walter Tavares, igrač Partizana Mathias Lessort, Lorenzo Brown iz Maccabija, te Saša Vezenkov iz Olympiacosa.

Čestitke!!!



BICIKLIZAM | LEJLA NJEMČEVIĆ NASTAVLJA NIZATI USPJEHE



U proteklom periodu Lejla Njemčević je ostvarila sjajne rezultate. Na Svjetskom kupu u Nove Mesto na Morave u Češkoj nakon 120 kilometara odnijela je pobjedu sa prednošću od skoro 3 minute od drugoplasirane biciklistkinje. Nakon upisa bodova najbolja bh. biciklistkinja Lejla Njemčević učvrstila se na prvoj poziciji UCI svjetske maraton ranking liste.

Tokom naredne utrke Svjetskog kupa u Italiji nakon duge i neizvjesne borbe, osvojila je drugo mjesto i upisala 200 bodova za UCI Svjetsku ranking listu.

Lejla je izvrsnom vožnjom zadržala prvo mjesto u generalnom plasmanu Svjetske serije i naredni Svjetski kup u Francuskoj će startati sa liderskom majicom. Čestitamo!

KLIZANJE | BIH KLIZAČICE LEILA I NADIA FESTIĆ IMALE SU ZAPAŽEN NASTUP NA TAKMIČENJU U MEKSIKU

Predstavnice Bosne i Hercegovine u umjetničkom klizanju, sestre Leila i Nadia Festić, članice Kluba sportova na ledu "Unity" iz Sarajeva, nastupile su na međunarodnom takmičenju, "MEXICO CUP 2023", koje je održano od 18. do 21.05.2023. godine u gradu Queretaro, Mexico.

Na ovom jakom takmičenju nastupilo je 550 klizača iz 9 zemalja. Naše Leila i Nadia imale su zapažen nastup u konkurenciji Juniorki. Leila Festić je zauzela 13. mjesto a Nadia Festić 17. mjesto.

„U Savezu klizačkih sportova BiH, uprkos svim problemima u ovom sportu, zadovoljni smo sa njihovim nastupom i rezultatom, a posebno smo zadovoljni kako su dostojanstveno i ponosno predstavili BiH u dalekom Meksiku“ – navodi Zikrija Đonko, predsjednik Saveza klizačkih sportova BiH.



CHEERLEADING | REPREZENTACIJA BOSNE I HERCEGOVINE ODUŠEVILA NA SVOM PRVOM SUDJELOVANJU NA EUROPSKOM PRVENSTVU



Prvi put u povijesti reprezentacija Bosna i Hercegovina je sudjelovala na Europskom prvenstvu u cheerleadingu. Preko 3 500 sportaša iz 22 zemlje sudjelovalo je na Europskom prvenstvu koje se održalo u Veroni u Italiji od 30.06. do 02.07. Bosna i Hercegovina se natjecala u 3 ekipne discipline i ostvarila odlične rezultate.

Pred juniori cheerleading osvojeno 6. mjesto
Juniori cheerleading osvojeno 4. mjesto
Performance cheer jazz osvojeno 7. mjesto

Cheerleading ekipe spremala je izbornica Nikolina Čolak, dok je performance cheer jazz ekipu spremala izbornica Dajana Markotić. Iz Saveza su izjavili: "Velika je čast biti među 22 zemlje, sportašice i sportaši su se naporno spremali za Europsko prvenstvo. Unatoč tome što nismo imali uvjete za pripreme kakve su imale druge zemlje, ekipe su pokazale svoj talent i oduševile sve prisutne kao i komentatore prvenstva. Olimpijski kanal je prenosio uživo prvenstvo, a nakon svakog nastupa ostali su oduševljeni izvedbama Bosne i Hercegovine jer na nas kao nekoga tko sudjeluje prvi put nitko ozbiljno nije ni računao. Nadamo se da ovi odlični nastupi naših sportaša i sportašica neće proći nezapaženo i da ćemo ubuduće imati podršku institucija kako bismo redovno mogli sudjelovati na prvenstvima te samim time rasti rezultatski."

GIMNASTIKA | REPREZENTACIJA RGI BIH SE PLASIRALA NA SVJETSKI SENIORSKI ŠAMPIONAT

Reprezentacija RGI BiH učestvovala je na Evropskom prvenstvu u Bakuu od 17. do 21.05. te se uspela plasirati za učešće na Svjetski seniorski šampionati koji će se održati u avgustu mjesecu u Valensiji (Španija).

EU PROJEKTI

OCEAN | ODRŽAN SEMINAR O MJERENJU KARBONSKOG OTISKA OLIMPIJSKOG KOMITETA BOSNE I HERCEGOVINE

Olimpijski komitet Bosne i Hercegovine sa timom olimpijske porodice nastavlja edukacije u polju mjerenja karbonske neutralnosti i sprječavanja emisije štetnih gasova u budućnosti.

“OCEAN” Erasmus+ projekt finansiran od strane EU, čiji je koordinator European Olympic Committees (EOC), započeo je sa edukacijama koje sporovode partneri ÖKO Instituta iz Njemačke.

Ovo je samo jedan u nizu seminara za jačanje kapaciteta europskih nacionalnih olimpijskih komiteta u cilju podizanja svijesti, te pružanja potrebnih alata karbonske neutralnosti i održivosti sportskih disciplina u budućnosti.

U skladu sa „dužnosti aktivnog doprinosa globalnoj održivosti“, opšti cilj OCEAN projekta je osnažiti nacionalne olimpijske komitete u sticanju znanja o mjerenju ugljičnog otiska i definiranju strategije za smanjenje emisije ugljika.

Koristeći sport kao jedan od najmoćnijih alata za pozitivan uticaj na društvo, OKBiH, kao dio velike olimpijske porodice, ponosan je na saradnju sa zemljama partnerima Europske unije i 18 Olimpijskih komiteta Europe u realizaciji projekta OCEAN.

Na linku [OVDJE](#) možete pronaći prvo izdanje OCEAN Newsletter-a i pročitati koje su se aktivnosti odvijale do sada.



PROJEKAT OLYMPIC KIDS | KICK OFF MEETING



U periodu od 19. do 20. juna 2023. godine Olimpijski komitet Bosne i Hercegovine bio je domaćin prvog Kick off sastanaka u sklopu projekta Erasmus+ pod nazivom: "Kids Running towards the Olympics – OlympicKids". Projekat je podržan od strane Europske komisije, te se u potpunosti

determiniše setom aktivnosti na vrijednosti olimpizma, sporta generalno, a ciljana grupa jesu svakako djeca.

Tokom trajanja Kick off-a koordinator Spor Elçileri Derneği (SPELL) iz Turske predstavio je radne prakete projekta, odredio rokove, te se raspravljalo o aktivnostima unutar zadanih ciljeva. Pored Turke i Bosne i Hercegovine, na projektu još učestvuju partneri Centro Sportivo Italiano (CSI) - Italija, Kyttaro Enallaktikon Anazitiseon Neon (KEAN)-Grčka, Skupnost raziskovalni in izobraževalni center (CERC) - Slovenija, Asociația Obștească Clubul Sportiv de Fotbal Feminin (NOROC) - Moldavija i Ayuntamiento de Pedreguer (PEDREGUER)- Španija.

Ono što nas dodatno raduje jeste da su OK BiH i Sarajevo još jednom pokazali vrijednosti kroz svoju dobru pripremu, profesionalnost i gostoljubivost. Naši gosti imali su priliku posjetiti mnoge znamenitosti grada Sarajeva, između ostalog i Olimpijski muzej Bosne i Hercegovine.

Kao olimpijski grad naša zemlja ima poseban značaj u ovom projektu.

Osnovna ideja projekta jeste socijalna inkluzija djece u riziku u i kroz sport, što su jedni od prioriteta Europske unije. Slijedeći te ciljeve poseban fokus je na poboljšanju zdravlja kroz fizičku aktivnost.

Olimpijski komitet Bosne i Hercegovine, kao organizator ovog događaja, dati će svoj puni doprinos njegovanju vrijednosti, kvalitete i ciljeva u naredna 24 mjeseca trajanja EU projekta. Više o ciljevima pročitajte na [OVOM LINKU](#).

Projekat će se implementirati do 2025. godine.



INTERVJU SA...

NEDŽADOM HUSIĆEM



OK BiH: Nedžade, nakon izvanrednog rezultata i osvojene srebrene medalje na Evropskim igrama u Poljskoj, sigurni smo da javnost želi čuti nešto više o tvojim očekivanjima od ostatka takmičarske sezone. Znamo da te očekuje velika transformacija, prelazak iz težinske kategorije -74kg u olimpijsku kategoriju -80 kg, kakav je plan priprema tebe i tvog tima i šta te očekuje u nastavku sezone?

NEDŽAD HUSIĆ: Takmičarska sezona koja je iza mene, sa moje tačke gledista i mog tima, bila je relativno uspješna, sa ogromnim prostorom za napredak, s obzirom na to da sam svjestan svojih mogućnosti!

U nastavku sezone planiram promjenu težinske kategorije, pa ću tako iz dosadašnje -74kg, ići u novu kategoriju -80kg.

Sa svojim timom, nakon kraćeg odmora, pokušat ću da održim formu i prilagodim se novoj kategoriji. Biće potrebno malo više napora, jačih treninga, ali optimista sam. Već sam nekoliko puta nastupio na Grand prix turnirima u toj kategoriji. U septembru me očekuje nastup na Grand Prixu u Parizu, pa će to biti odličan test za mene. Bodovi za Olimpijadu u toj kategoriji su počeli da se prikupljaju već od završetka prošle Olimpijade. Moja trenutna pozicija na rang listi u toj kategoriji je takva da se nalazim na 12. mjestu. Cilj je biti do petog mjesta. Prvih pet sa liste direktno se plasira na Olimpijadu, a svi ostali pokušavaju kroz kvalifikacije. Sa svakog kontinenta kvalifikuje se pobjednik.

OK BiH: Uzor si mnogim klincima u Bosni i Hercegovini i sigurno si dao veliki doprinos da taekwondo postane jedan od najpopularnijih sportova u našoj državi zahvaljujući vrhunskim rezultatima koje postižeš. Šta te najviše motiviše i koju bi poruku poslao mladim sportistima?





NEDŽAD HUSIĆ: Veseli me činjenica da sam, na neki način, već sada uzor mlađima i to me izuzetno raduje. Poruka koju bih imao za njih, jeste da sve što rade, rade najbolje što mogu. Koji god sport da treniraju, samo neka žele i daju sve od sebe.

Zaista mislim da je potrebno dosta odricanja, znoja, strpljenja i volje, ali na kraju, to je ono što vas odvaja od prosjeka. Moja motivacija je uvijek želja da sebi dokažem da nešto mogu, a velika motivacija mi je i kad osjetim i vidim da se drugi raduju mom uspjehu. Kad osjetim da sam obradovao mnoge svojim uspjehom, činjenicom da se negdje čula himna naše države i podigla zastava BiH, kao da dobijem krila. Općenito kad Bosna i Hercegovina napravi neki uspjeh u sportu ili bilo čemu pozitivnom.

OK BiH: *Kome duguješ najveće zasluge za svoj sportski uspjeh?*

NH: Zasluge za svoj uspjeh dugujem prvenstveno mojoj porodici, koja je od samih mojih takmičarskih početaka bila uz mene i bila moj jedini sponzor, te mom klubu Novi Grad, trenerima Harisu Husiću i Belmiru Berberoviću, Taekwondo savezu BiH na čelu sa gospodinom Samirom Šarićem. Zahvalan sam naravno i prof. dr Safetu Kapi, sa kojim također od nedavno saradujem, te Elmiru Čerimagiću!

OK BiH: *Pored toga što si vrhunski sportista, uzoran si student druge godine Internacionalnog Burch univerziteta, IT odsjeka. Da li ti pored treninga i obaveza vezanih za fakultet ostaje vremena za slobodne aktivnosti i kako to vrijeme provodiš?*

NH: Uz sport, student sam druge godine BURCH Univerziteta u Sarajevu, na odsjeku IT. Pokušavam da uskladim predavanja sa svim treninzima. To naravno iziskuje mnogo vremena i odricanja na svim ostalim poljima, ali ja vjerujem da je to moj prioritet uz sport trenutno. Ostatak slobodnog vremena, ako ga ostane, koristim za druženje s prijateljima na planini, ali uglavnom je to neka vrsta "aktivnog odmora".

OK BiH: *Hvala Nedžade, želimo ti mnogo uspjeha i sportske sreće na putu ka Olimpijskim igrama Pariz 2024!*

ZAVIRITE U DRUŠTVENE MREŽE OK BiH (klikom na sliku)



Pratite nas na društvenim mrežama:
(klikom na ikone)



©2023. Olimpijski komitet Bosne i Hercegovine. Sva prava zadržana.
www.okbih.ba

Specijalnu zahvalnost dugujemo sponzorima i partnerima OK BiH.
Klikom na logo posjetite njihove oficijelne stranice.

